

Tixrmoxrtaexl Sul Vaexr Maele Ber

1

¹Tixrmoxrtaexl, ngo mel Barloxr a. Niul leil jiuxlsu Arbosobo mel yar xiar ji dae mel dax zox dae a ngo leil Yisu Zidu miardal dae ca ddei bei lol a. Yar ngo leil tiur a mel ca mel leil bbeix gger ssi lol, Yisu Zidu leil ddarzzi su mel olga sixl li wo ddo. Eil ddei mel Arbosobo bbeix har zaxr goxr a. ²Ngo perniar dae albor, ngo ni leil xil vaexr gger, niul ddei Arbbor Arbosobo nei niul ddei Seirpor Yisu Zidu ni leil cirza-hanga meixl gger lol nia, ni leil zoxlnixr lol nia, ni leil nixmox zzaso lol nia.

Arbosobo Leil Nawo Nei Tixrmoxrtaexl Leil Nixmox Dder Vaer

³Ngo Arbosobo leil nawo a. Yar mel hherdder ngo nei ngo ddei porpor mel visser dae Arbosobo ddei nga a. Ngua Arbosobo leil visser dae car a mel nixmox zzar armael leil botaddu nr zza. Ngo merxixl-merni Arbosobo dax ddar biar a lei ni leil holcir doxr dae. ⁴Ngo ni meixbbix ddux car a leil holcir du lei a dder ni leil yarzi sael mia niazzir, ni leil mia a ngo dder yarzi sael ggese. ⁵Ngo holcir dae, ni mel Arbosobo leil ddarzzi laexl nr nga a nei, yarzi ddarzzi. Ni nianeipo Loxryir nei niama Yornixrzi yaa saelsael a Arbosobo leil ddarzzi. Ngo ddarzzi, yaa nixmox zzar arsae ddarzzi mel ni lei arsae ddarzzi. ⁶⁻⁷Arbosobo niul leil yar ddei Xiu ddei gger a mel niul leil gexr lol nr nga, yar ddei Xiu ddei mel niul leil ddoddomo bei lol, ca leil perniar lol, armael leil guaxr ssei xie lol, yel ngo ni leil bbeix gger, ni ni ddei bbesur mel sser holcir dae nia, hherdder adoxl ggu doxr dae a bbiu nr zil lol sael a nga. Bbesur eil ddei mel ngo leixrhher ddei ni leil ta gex dae car a, Arbosobo ni leil gger arddeir a.

⁸Yel ni niul ddei Seirpor arseir a ca leil biar gger a seixlda nr ssa, ngo Yisu Zidu leil weix a ca mel ngo leil cageggie ge ji gger a lei ni seixlda nr

ssa. Ni Arbosobo ni leil bbesur gger mel dax zox dae a, ca mel leil Yisu ddei ddar seirseir mel biar gger ssi a, ngo dax cirgo a goxr sol nia.

⁹ Arbosobo niul leil jiuxl nei niul leil tiur teixl lei a yar ddei seirceix-seirmaer cassor-worssor bei lol. Yar eine bei a mel niul azo seirseir bei goxr nr nga a nei, Arbosobo yar xiar ji dae mel sael a bei, halae yar cirza-hanga seirseir mel niul leil meixl gger a nga arddeir a. Cirza-hanga seirseir eil mel mel azo lei nr zza seir dder Arbosobo mel Yisu Zidu leil sser dae a, niul leil meixl gger ho a; ¹⁰ nael eilleix niul leil jiuxlsu Yisu Zidu lei ho a saelnei eil mel leil saexl ddo. Yar mel yar leil ddarzzi su mel si a, yaa leil gol du xixl lei lol. Yar yar ddei ddar seirseir mel sser dae a ca mel leil cirse-cirsil lei si nr var olga zza saexl lol.

¹¹ Arbosobo ngo leil zi teixl a ddar seirseir eil mel ca leil biar gger su bei lol, Yisu miardal dae ca bei lol nei sulmulsu bei lol. ¹² Yel ngo goxrsol-goxrnaxr mel goxr. Ngo arseir leil ddarzzi dae mel ngo saexl, halae ngo lei ddarzzi, ngo yar leil jia gger goxr mel^a lei yar zabbar seirseir a guaxr dae lei, hherdder Seirpor Yisu jjixr lei hal cir ni zzezze ci, yel ngo goxr solsol eil mel goxr a lei seixl-nr-da.

¹³ Ni Yisu Zidu leil ddarzzi doxr dae, yar leil perniar doxr dae a, ngo ni leil hoxrhoxr mul gger dae mel dax zox dae a ca mel leil mul gger nia.

¹⁴ Ni ni nixmox zzar hher ji dae Arbosobo ddei Xiu ddei leil koxl dae a, ni leil jia gger goxr seirseir mel dax zabbar seirseir a bei mae dae nia.

¹⁵ Ni lei saexl Yalxilyal mermi su ca maelmaerjjia lei ssi du si, ngo leil cirdoxr lei nr guaxr; Feijirlul nei Hiemoxrqixrnixr yaa lei eil mel sael a bei.

¹⁶ Nael Anixrsaexlfuxr mel ngo leil nixmox hormo boxl nei dder vaer, ngo leil nixmox zzar ggese lol, ngo Yisu leil weix a ca mel ngo leil ge du

^a**1:12** ngo yar leil jia gger goxr mel/Ca cirmelmel a zzir dae a “yar ngo leil jia gger goxr mel,” eine bbeix.

lei a lei yar seixl-nr-da, yel Seirpor leil yaa hhexr leil zoxlnixr lol nia.

¹⁷ Yar halae Loxrmr zzi gga lei ci a, ngo leil arsae zo nokor zo doxr a dder ngo leil zo wo a. ¹⁸ Nixixl hal cir ni ci a, Seirpor leil yar leil zoxlnixr lol nia! Yar Yirfuxrsor zzi gga hher dae a ngo leil arsae beijiu mel ni lei saexl.

2

Yisu Zidu Ddei Meixr Yarzi Sexr Hal Mel

¹ Yel, albor, ni mel Yisu Zidu ni leil cirza-hanga seirseir meixl gger mel leil koxl dae a hhel du lei nia. ² Ngo nia ca cirke leil mul gger dae eil mel, ni zzir dae a kebal ca leil mul gger var ddo nei ddarzziddo ca hal mel leil mul gger ssi nia.

³ Ni Yisu Zidu ddei meixr yarzi sexr yarzi seir ddei sael a nga, ni Yisu leil weix a goxr sol nia. ⁴ Meixr mu su mel yar ddei vaervaerpor leil ggese lol niazzir a mel, yar dder kebal sirzzir hal mel yar leil dawo lol nr ddo.

⁵ Beix birvul su ca mel lei eine nga nia. Yaa beix birvul dae car a, dixl har dae ddei dax zox dae a nr beix a mel dder beix leixl a li wo ddo oldde leil ddexrlabox naxrcixlcixl hal ddei li wo nr ddo. ⁶ Mi paxr su ca hanol sulku hal mel leil mel hoba loxlmoxr bbe gger mibbe. ⁷ Seirpor mel ni leil cirza-hanga sirzzir mel saexl lol niazzir, yel ni ngo ni leil mul gger dae ddar mel leil zabbar seirseir a xiar nia.

⁸ Ni Yisu Zidu leil holcir doxr dae nia, yar mel si ho a Arbosobo yar leil gol du xixl lei lol a; yar Daxlweixl giedae ca a. Eil mel mel hherdder ngo ca leil biar gger dae Yisu Zidu ddei ddar seirseir mel nga a. ⁹ Ngo ddar seirseir eil mel leil weix a goxr sol lar nr suax, ca mel halae ngo leil loxrgier su sael a neixl gex du lei, nael yaa ngo leil neixl gex dae cexr

arnar a Arbosobo ddei ddar mel leil neixl gex dae nr cexr.^{b 10} Yel ngo dder Arbosobo tiur har dae cassor-worssor mel leil weix a ciryoxr-hanga goxr solsol eil mel pex dae a lei sser gex dae. Yisu Zidu leil yaa leil lei jiuxl wo lol, halae yaa leil cirse-cirsil lei middux lol.

¹¹ Jiasibbor vaexr dae ddar mel ddarzziddo, hherdder bbeix:

Niul Yisu Zidu dax cirgo a si arddeirnga a,
niul dder yar dax cirgo a gol dae.

¹² Niul sser gex doxr dae arddeirnga a,
niul dder yar dax cirgo a zzirmar bei.
Yar leil saexl cexr nr ssexl arddeirnga a,
yar lei niul leil saexl cexr nr ssexl.

¹³ Niul yar leil lalal a ddarzzi zzorbbeixlei,
yar bbeix ci goxr mel yar bei nr ci nr zza,
yel yar leil mel ddarzziddo.

¹⁴ Ni yaa leil eil mel holcir doxr dae lol nia. Ni Arbosobo meixsaer qier leil ca mel leil quex a azo lerler ddar hal mel zex nr ddo. Eil mel leil zex a mel ca leil ke var lalnga, ca dax seirggiebbæer nr zza. ¹⁵ Ni arsæe bei var arsæe bei nia, yel arddolcar a ni Arbosobo meixsaer qier leil hher dae a, yar ni leil kuar gger lol. Ni Arbosobo leil miar bei gger a yixrsixr nr zza zza nr var halae ni ca leil Arbosobo ddei ddarzi mel mul gger a mel mul gger hoxr. ¹⁶ Arbosobo ddei ddar nr nga hal mel leil biar su ca hal mel mel ho bei ho Arbosobo leil i nr du var, yel ni ddar eil mel dax naer nr ddo. ¹⁷ Yaa ddar biar dae hal mel mel hherdder ggecir leil ggier yarzi duxr ggier dae mel sæel a nga, ho bei ho xiæxr. Sumirnaer nei Feilirtur

^b2:9 Yilsi mel dder bbeix: “Yaa ngo leil neixl gex dae a lei, nael Arbosobo ddei ddar mel halae biar teixl cexr.”

yaa nr nel mel dder eine nga ho a. ¹⁸ Yaa mel ddarzi nr nga mel ca mel leil mul gger, (hherdder ca mel leil jjiimo ssi cox lol sael a nga). Yaa mel ca mel si a yoxl gol du xixl lei sirzzir eil ddei goxr jixr ho a eine bbeix, yel ca cirmelmel leil Arbosobo leil ddar-nr-zzi lol. ¹⁹ Nael Arbosobo ddei jiaxlhuixl ddei mel sixrjiuxr yarzi hhel xiex dae hal mel sael a nga,^c cir doxr lei ha nr var. Sixrjiuxr leil mel “Seirpor yar ddei ca mel leil saexl” eine kaexl deix dae. Halae “Arseir Seirpor ddei ca a cexrssexl a mel yar dder zuixl bei nr ddo, nr hoxr mel bei nr ddo,” kaexl deix dae.

²⁰ Cabessor mel ake gga mel, piu, sae, six bei teixl lei nei nilhar cu teixl lei azo lerler jilabox hal mel cirke zza, cirmelmel a nael zoxlyoxl ggie sserlabox, cirmelmel a nael zoxl-nr-yoxl ggie leil sserlabox. ²¹ Yel arseir armael leil nixmox cirtaex-lorbba seibeix lol a, nr seir nei nr hoxr mel nr bei a mel dder middurbbor ca nr seir mel dax bbe kae a, armael leil Seirpor leil gger, yar dder jilabox yarzi zoxlyoxl hal ddei sael a nga, yel Seirpor dder yar leil hanol sser a, cirza-hanga seirseir mel bei ssi lol.

²² Ni mel caleixlssor mel xiar dae nr hoxr hal mel xiar nr ddo. Ca cirmelmel a nixmox zzar seibeixbeix arla Seirpor leil qiuxr a yaa leil beijjiu lol. Yel ni mel bei seir nei bei hoxr mel bei nia, Yisu leil ddarzzi nia, ca leil perniar nia, halae ca dax toltor a bei nia. ²³ Ni ca mel zex dae ddar yarzi medeil hal mel dax zex nr ddo, ni lei saexl, yarzi medeil zex dae eil mel mel ca mel leil zzicarzzi dax zzi hie lol var lalnga. ²⁴ Seirpor leil visser su mel mel ca dax zex nr ddo, ca dax toltor a bei lalldo, ca leil mul gger a yarzi mul gger seir, azo bei lei ssertexr zza nia. ²⁵ Ddar norlixlix mel sser a niul leil dir su ca mel leil quex nia, nrbbba Arbosobo yaa leil huixrsoxr lol a ddarzi mel leil saexl lol lei saexl nr ddo. ²⁶ Eine nga a mel neir zzirmar te ddoddo-nrddo yaa leil ssu si a, yar ddei ddar no lol a lei, nael yaa zucur a mel dder neir zzirmar te yaa leil xiexl dae

^c2:19 Tixrmoxrtaexl Sul Vaexr Beil Ber 3:15 leil i ssi.

ddei gga pa teixl lei wo a.

3

Nixixl Ddei Maelele Ci A Ca Mel Arsaesael Nga Biar

¹Ni saexl nia, nixixl maelele ddei gga mel, cirza-hanga goxrsol-goxrnaxr mel lei ddux lei du a. ²Hane ci a mel, ca mel lei armael leil lar guaxr, zzirbae tuxr, yarzi kuarddo, yarzi col, Arbosobo leil nei ca leil bbeix no, arbbor ama ddei ddar nr no, si yar leil azo lerler gger a lei si leil na-nr-wo, Arbosobo leil nr zi, ³cirssor ga leil lei per-nr-niar, si dax toltor a nr bei, ca leil bbeix vuxryixr, armael leil guaxr ssei nr xie, walwoxr, seirseir bei nr meixr. ⁴Gaxggor carbeix leil vur lel, arsae bei niazzir arsae bei, yarzi olvaer, goxr seir meixr gaxggor meixr lalnga, Arbosobo leil per-nr-niar. ⁵Yaa leil i dae a zzae Arbosobo leil i du, nael yaa Arbosobo ddoddomo bei dae mel leil cexr-nr-ssexl. Yel ni ca eil mel dax naer nr ddo.

⁶Yaa ca mel gga cirmelmel a yoxl si ake cualcixl-cualge cual ssi a ssormaer mel leil fur ssi. Ssormaer eil mel zuixl bei meixr, nolba nor, cirza-hanga nr seir xiar dae mel lei yaa armael leil nol dae. ⁷Yaa zoxlzoxl a cirza-hanga zza dae, nael yaa ddarzi mel leil saexl nr var. ⁸Halleix Yarnixr nei Yarpir yaa Moxrxi leil arsae dir mel, ssormaer eil mel leil fur ssi su capor mel dder Arbosobo ddei ddarzi mel leil arsae dir. Yaa nixmox zzar xiar dae mel yarzi nr seir, yaa mel Yisu leil ddarzzi laexl lalnga.^d ⁹Nael yaa yarzi medeil bei dae eil mel maelmaerjjia lei ca mel saexl var, hherdder halleix Yarnixr nei Yarpir yaa bei dae mel ca mel

^d**3:8** *yaa mel Yisu leil ddarzzi laexl lalnga.* Yaa yarzi Yisu leil ddarzzi nr nga, yel yaa ddarzzi a lei baexr a ddarzzi lalnga, Arbosobo dax nixlox-nr-dda.

saexl sael a nga, yel yaa zeixleixr lei ca mel leil fur ssi nr cexr a.

Tixrmoxrtaexl Leil Maele Zzir Mul Gger Hal Boxl

¹⁰ Ni mel ngo ni leil mul gger dae mel noni a, yel ngo arsae bei dae mel ni lei arsae bei dae, ngo ca mu eil se azo bei nia dixl har dae mel, ni lei bei ssi dae a. Ni ngo saelsael a Yisu leil ddarzzi, ssertexr zza, ca leil perniar, halae sser gex doxr dae. ¹¹ Ngo Atixr'a zzi gga nei Yirgenixl zzi gga halae Luxlsidaexr zzi gga hher dae car a, ca mel ngo leil arsae goxr sol lol nei ngo leil arsae kexiex mel ni lei saexl. Ca mel ngo leil einezeixl kexiex bbeixarnar, nael Seirpor ngo leil goxrsol-goxrnaxr eil mel maelmaerjia gga jiuxl teixl lei a. ¹² Yarzi bbeix: Arseir Yisu Zidu dax mae lei niazzir, nixixl goxr a lei Arbosobo leil i du a mel, ca mel dder yar leil kexiex var. ¹³ Yarzi gexrddo bei su ca mel nei ca fur su ca mel cir ni bir cir ni leil nr seir, yaa lei si leil fur, si lei yaa leil fur. ¹⁴ Nael ni ddei sulmulsu arseir lerler a mel ni ddei ni saexl, yel ni ddarzzi dae ddarzi mel leil zabbar seirseir a ddarzzi zei si nia. ¹⁵ Ni mel ye tor seir dder Arbosobo Ddei Sul ber leil saexl. Sul eil ber mel ni leil Yisu Zidu leil ddarzzi lol a, Arbosobo ni leil jiuxl saexl lol hal ber nga a. ¹⁶ Arbosobo Ddei Sul eil ber mel cirber-lorbba lei Arbosobo ddei Xiu ddei ca mel leil vaexr zei lei lol a. Sul eil ber leil vaexr dae ddar mel, ca leil mul gger dae lei zza, ca leil bota dae lei zza, ca leil gierbox lol dae lei zza, halae ca leil mul gger a hoxrhoxr bei ssi lol dae lei zza, cirber-lorbba lei ca dax yarzi seir, ¹⁷ yel Arbosobo ddei cassor-worssor mel leil zza lol a, yaa leil azo lerler seirseir mel bei ssi lol.

4

¹ Yisu Zidu mel jjixr lei a zzirmar bei a, gol dae ca nei si ho ca mel leil serpaxl jjixr lei du a. Yel ngo Arbosobo nei Yisu Zidu meixsaer qier leil zabbar seirseir a ni leil miardal: ² Ni ca leil Arbosobo ddei ddar biar gger

nia, ca mel noni dil ddo bbeixsael noni dil nr ddo lei ni yaa leil biar gger nia. Ni ssertexr zzazzamo bei a, ca leil mul gger a, bota nia, yaa bei nr hoxr mel gierbox nia bbeix gger nia, yaa leil nixmox dder vaer gger nia. ³ Arddolcar ci a, ca mel hoxrhoxr mul gger dae hal mel leil noni gexr noni zi a, yaa dder armael xiar dae mel sael a sulmulsu cirke zo wo a, yaa biar dae mel leil noni meixr. ⁴ Yaa mel nolba ddei ddaexrcir dae a, ddarzi mel leil no-nr-ni, nrbba nrbba biar dae gurlir mel leil noni ssi. ⁵ Nael ni mel azo bei lei barverver a bei nia, cirza-hanga goxr sol mel pex dae a lei sser gex dae nia, ca leil Arbosobo ddei ddar biar gger ssi nia, ni arsae bei var arsae bei a, ni leil jia gger goxr miar mel bei zei si nia.

⁶ Ngo leil mel Arbosobo leil zilabox puxrto zzibbaer sael a zi ggie dox deix ho a. Ngo middurbbor nr hher, ssi du a. ^{e 7} Ngo ddaexrlabox zaxl mel mel ngo ddaexr ho a; ngo beixladox jjiumo mel mel ngo beix jjia ho a; ngo ddarzzi dae ddei leil mel ngo velvermo ddarzzi zei lei a. ⁸ Eilni cirdae mel, Arbosobo dax bei mae dae su ca mel oldde leil ddexrladox naxrcixlcixl ddei mel ngo leil bei har zaxr gger dae a. Hherdder bbaehhexhhexmo ca leil serpaxl su Seirpor ddei jjixr lei hal cir ni ci a yar ngo leil gger hal ddei nga a. Ngo leil lar gger nr nga a nei, yar leil mia loxia su ca maelmaerjjia leil lei gger.

Barloxr Ddar Biar Jjia A

⁹ Ni nialngasael ngo dax eilmaex lei nia. ¹⁰ Dirmar mel middurbbor ddei cirza-hanga mel leil li meixr a, yel ngo dax cirgo a nr hher Tisarloxrnixrjia zzi gga ssi jixr ho a. Gerlexlsixl nael Jialataexl mermi ssi

^{e 4:6} Yirsaexllixl su ca mel Arbosobo leil zi halcar, yaa xilmeir acixl halae loxlmoxr nei ssuvi zi, maelele nael puxrto zzibbaer zi. Barloxr Arbosobo leil weix a si niazzir dae a; yel yar zzir dae a yar mel Arbosobo leil zilabox maelele puxrto zzibbaer sael a nga.

jixr a; Tixrdo nael Darmartael mermi ssi jixr a. ¹¹ Luxljia larnei ngo dax cirgo a hher dae a. Ngo Arbosobo ddei ddar mel ca leil biar gger a, Marker mel ngo leil beijiu var, yel ni yar leil hier dax si la. ¹² Ngo mel Tuizigur leil zi teixl a, Yirfuxrsor zzi gga ssi lol ho a. ¹³ Ni lei car, ngo leil ngo Taelloxryal zzi gga hher dae a Jiabuxl hhexr ake dol dae teixlsibbor veixrlabox pia hal xiux vei bo la. Halae sul jur gex dae hal mel ngo leil vei bo la, acixl zzi nei ya zzi leil sul vaexr deix dae jur gex dae hal mel gielgiel ni ngo leil vei bo lei nia.^f

¹⁴ Zzir ddaexr su Yallixlsadaxl ddei mel ngo leil yarzi ke larhor, nael Seirpor mel yar bei dae mel dax zox dae a yar leil bei koxl xixl var. ¹⁵ Yar mel ngo ca leil biar gger dae ddar mel leil daxlgaxl dir goxr a. Yel ni yar leil fadae nia.

¹⁶ Ngo leil eilmaex caserggie gga ser beil halboxl, ngo leil bbeix jjiu su lei ar ddei nr zza. Ca mel maelmaerjjia lei ngo dax nr hher ssi du si a. Ngo Arbosobo leil qiuxr a, yaa ddei zuixl mel yaa oldde leil tor nr ddeix lol. ¹⁷ Seirpor lar ngo dax ngier dax dae a ngo leil worni du lei lol, yel yar ddei ddar seirseir mel maelmaerjjia Yoxrtaexl su nr nga ca mel leil biar gger ssi lol. Yar ngo leil hhemar meir gga jiuxl teixl lei a. ¹⁸ Ngo cirza-hanga yarzi nr seir hal mel pex dae a lei, Seirpor ngo leil jiuxl teixl lei var halae ngo leil Merhhexr ddei goxr gga ddir lol. Yar leil cirse-cirsil lei middux lol nia! Amae.

¹⁹ Ngo ni leil qie, ni ngo leil Baerzila nei Yaljula yaa nr nel leil halae Anixrsaexlfuxr yaa cirhhexr-lorbba leil zzasoso dae biex gger ssi.

²⁰ Yirladu mel Gelixrdo zzi gga hher dae a. Texlloxrfeimoxr nael no a, ngo yar leil Mirlildu zzi gga hher dae lol a. ²¹ Ni nialngasael lei a, zzixzi nr ci seir xilmeir leil lei ci nia. Yorbuxlloxr, Buxltixr, Lilnur nei

^f**4:13** Acixl zzi nei ya zzi bei teixl lei hal mel yarzi naxrcixl yarzi ssei, yel ddar yarzi zoxlyoxl hal mel halmaex vaexr deix dae.

Gexrlardiryal yaa nei kebal arzzi-nimar arzzi-nimo maelmaerjia lei ni leil zzasoso dae biex dae.

²² Seirpor leil ni dax cirgo a hher dae lol nia! Arbosobo leil nia leil seirseir mel meixl gger lol nia!